

## WILLIAMS, DAVID PRYSE ('Brythonydd'; 1878 - 1952), gweinidog (B), llenor, a hanesydd

**Enw:** David Pryse Williams  
**Ffugenw:** Brythonydd  
**Dyddiad geni:** 1878  
**Dyddiad marw:** 1952  
**Priod:** Annie Lydia Rhys (née Morgan)  
**Rhiant:** Elizabeth Williams (née Jones)  
**Rhiant:** Ivor Pryse Williams  
**Rhyw:** Gwryw  
**Galwedigaeth:** gweinidog (B), llenor, a hanesydd  
**Maes gweithgaredd:** Crefydd; Hanes a Diwylliant; Llenyddiaeth ac Ysgrifennu  
**Awdur:** Benjamin George Owens

Ganwyd Dydd Gwyl Ddewi 1878 a'i fagu yn y Wenallt, plwyf Troed-yr-aur (Trefdreyr), Ceredigion, ei dad Ivor Pryse Williams (1850 - 1920) yn fab i'r offeiriad llengar **Benjamin Williams** ('Gwynionydd'; 1821 - 1891, a'i fam Elizabeth yn ferch i deulu o Fedyddwyr yn eglwys Bethel, Dre-fach Felindre, a dau o'i brodyr, David Phillip Jones (1850 - 1884), Fellingwm a Llanfynydd, a Samuel Jones (1857 - 1935), Lloneirwg, wedi eu codi i'r weinidogaeth. Dilyn ei fam i gorlan y Bedyddwyr wnaeth y mab, dechrau pregethu yn 1903 a llwyddo gyda chlod y flwyddyn wedyn yn arholiadau'r enwad. Derbyniwyd ef yn 1908 i Goleg Efengylaidd (Bedyddiedig gan mwyaf) Dunoon yn Kirn, swydd Argyll, ac ar ben cwrs dwy flynedd ordeiniwyd ef, 21 Mai 1910, yn weinidog Ffynnonhenri, a'i gofrestru i fwrw dwy fl. ran-amser yng Ngholeg Presbyteraidd Caerfyrddin wrth draed **M.B. Owen** (1875 - 1949. Symudodd yn 1913 i Philadelphia, Abertawe (gan dreulio ysbaid fer yn ystod Rhyfel Byd I gyda'r Y.M.C.A. yn swydd Gaint), ac oddi yno yn 1920 i Libanus, Treherbert, lle'r arhosodd weddill ei oes yn uchel ei barch a'i ddylanwad. Gartref y bwiodd ei fywyd hyd at ei 30 oed, yn llynydda ac eisteddfota ac yn chwilota hanes y darn gwlad sy'n ymestyn o Gastellnewydd Emlyn i gyfeiriad y môr ym mhlwyf Penbryn, ac er gwaethaf pyliau mynych o wendid corff mae'n ddau mai degawd cyntaf y ganrif oedd blynyddoedd mwyaf toreithiog ei ymchwil. Cyhoeddodd ffrwd o gerddi, ysgrifau a nodiadau ym mhapurau wythnosol Aberteifi ac Aberystwyth a chylchgronau megis *Seren Gomer*, *Yr Athraw*, *Archæologia Cambrensis*, *Byegones* a'r *Geninen*, ond ni chyhoeddwyd ei draethawd ar Hanes Cenarth a wobrywyd gan **Syr John Rhys** yn eisteddfod Castellnewydd Emlyn yn 1902. Yn y cyfnod hwn bu'n gohebu â nifer o brif ysgolheigion Cymraeg y dydd. Yn ystod ei gyfnod yn Nhereberbert llwyddodd i warchod archifau swyddogol y capel ac ysgrifennodd *Canmlwyddiant Libanus ... braslun o'r hanes* [ 1950 ]. O'i ddyddiau cynnar bu'n weithgar yn achub llyfrgelloedd enwogion a chyfoedion, ac ar brydiau'n troi'r deunydd yn sail cofiannau, e.e. ei daid '**Gwynionydd**'; **David James**, 'Defynnog' (1865 - 1928), Lewis Jones, y cerddor o Dreherbert (bu farw 1882), William Evans Davies (1861 - 1945), Drefach, Rees Price (bu farw 1896), Cilfowyr, **John Gomer Lewis** (1844 - 1914) a David Price (1865 - 1931), ill dau o Abertawe, ac Anthony Williams (1845 - 1913), Ystrad Rhondda; ac atynt hwy Rhys Jones Lloyd (1827 - 1904), mab plas y Bronwydd yn Llangunllo, rheithor Troed-yr-aur, a'i gymydog helyntus o Annibynnwr Thomas Cynfelyn Benjamin (1850 - 1925), Pen-y-graig, y bu D. P. W. â rhan yn y gwaith o godi carreg fedd iddo ym mynwent Llethr-ddu, Trealaw.

Priododd, 1 Hydref 1941, yn y Tabernacl, Caerdydd, ag aelod o'i eglwys, Annie Lydia, unig ferch David a Jane Morgan, Cedrwydd, Treherbert, dirprwy brifathrawes Ysgol Gynradd Penyreglyn ac ysgrifenyddes Cymdeithas Cymrodorion Treherbert. Bu ef farw yn sydyn yn Ysbyty Church Village, 27 Hydref 1952 a'i gladdu yn Amlogfa Glyn-taf.

### Awdur

**Benjamin George Owens**

### Ffynonellau

Ei gasgliad llawysgrifau, **NLW MS 15622-15963** a **NLW MS 15985-16039**, a ffotograffau, 347-401

**Benjamin Williams** ('Gwynionydd'), 1821-1891, *Ceredigion*, 5 (1967), 347-401 (yn cynnwys yr achau)

Sidney Jenkins, *Hanes Eglwys y Bedyddwyr, Ffynnonhenri* (1930) (1930), 60

Walter J. Evans, **NLW MS 10330B: Carmarthen Presbyterian College roll of students** 261

*Seren Cymru*, 21 Tachwedd 1952, 11 Chwefror 1955, 20 Awst, 10 Medi 1965

*Dyddiadur a Llawlyfr Undeb Bedyddwyr Cymru*, 1953, 180-1

*Baptist Handbook*, 1954, 341

*Trafodion Cymdeithas Hanes Bedyddwyr Cymru*, 1964, 40-1, 48-9, 1967, 38-48, 1976-7, 42, 1987, 45-56

*Western Mail*, 31 Gorffennaf 1965

*Rhondda Leader*, 1, 8 Tachwedd 1952, 6 Awst 1965

gwybodaeth gan ei frawd-yng-nghyfraith, Parch. T. Haydn Morgan, Ystradmynach

### Dolenni Ychwanegol

Wikidata: Q28360833

**Dyddiad cyhoeddi:** 1997

**Hawlfraint Erthygl:** <http://rightsstatements.org/page/InC/1.0/>



Owens, B. G., (1997). WILLIAMS, DAVID PRYSE ('Brythonydd '; 1878 - 1952), gweinidog (B), llenor, a hanesydd. *Y Bywgraffiadur Cymreig*. Adferwyd 27 Hyd 2024, o <https://bywgraffiadur.cymru/article/c4-WILL-PRY-1878>

Y Bywgraffiadur

Preifatrwydd a Chwci  
Hawffraint  
Y Prosiect  
Cymorth  
Cysylltu

LGC  
NLW

LLYFRGEL  
THE NATION



Yn ddiwedd  
Llywodraeth Cymru  
Supported by  
Welsh Government